

小

腆

紀

傳

小腆紀傳卷第五

前翰林院檢討加詹事府贊善銜六合徐肅謨

紀第五

永曆中

我

大清順治七年庚寅春正月乙卯朔上在肇慶稱永曆四年
晉李元胤車騎將軍爵南陽伯固辭不許丁巳南雄陷守將
武陟伯閔可義死之羅成耀棄韶州走尋伏誅辛酉上出奔
命元胤督理各營軍務留守肇慶戊辰我

大清兵至韶州南澳總兵吳六奇降進逼廣州杜永和自虎
門入城固守庚辰上至梧州黃士俊罷召朱天麟入直命陳

邦傅高必正會兵援廣州二月丁亥給事中丁時魁金堡蒙
正發翰林院侍讀劉湘客以罪下獄尋遣戍戊戌武岡復陷
奉天總督劉祿監軍御史毛養登死之馬進忠退保靖州己
酉我

大清兵攻廣州叛將羅守誠伏誅博興伯張月安肅伯李建
捷總兵吳文獻等力戰不下是月惠州總兵黃應傑巡道李
士璉知府林宗京執趙王由棧及郡王十三人以叛降於我
大清江西甯都陷監察御史涂伯昌兵部員外郎彭錕死之
鳳陽義師潰總督兵部尚書王爍死之三月己未卯刻日赤
如血龍虎關陷總兵向明高姚得仁戰死曹志建奔權陽推
官唐誼被執不屈死之夏四月彬州陷巡撫黃順祖總兵林

國瑞死之召王化澄入閣嚴起恆自劾去五月鄖國公高必正興平侯黨守素南陽伯李元膺朝於行在乃復召起恆入閣改戍金堡於近地科臣張孝起李用楫與御史廖永亨互訐詔中書科非軍國大事本章不許封進以兵部左侍郎萬翱掌尙書事起復魯可藻爲兵部侍郎陳邦傳龔高必正營必正西走時廣州圍愈急安定伯馬寶龔清遠以救之戰敗李元膺馬吉翔駐兵三水不敢進部臣束手無策惟晉封杜永和等爵爲侯以慰勞之又晉焦璉宣國公胡一青衛國公曹志建保國公六月文安之朝於行在命入閣辦事是月朱成功討碣石總兵蘇利不克旋師圍潮州我

大清兵復取雲霄詔安進攻盤陀嶺成功部將柯宸樞戰死

遂解圍軍於潮陽秋八月孫可望復遣使行在以不改號請
付廷臣集議是月朱成功襲殺鄭聯取廈門遂取金門九月
瀧陽陷知縣李遇昇死之曹志建奔恭城馬進忠走武岡山
中桂林大震連陷全州趙印選胡一青王永祚退入桂林於
是榕江遂成空壁莫有堵禦者是月孫可望由雲南東襲貴
州皮熊走清浪衛追執之襲平越僉都御史巡撫郭承汾威
清道黃應運總兵姚某劉某等皆死之分遣其將劉文秀取
四川忠國公王祥迎戰烏江敗績死之攻建昌衛前長沙知
縣高明死之陷黎州土千戶馬亭李華宇等死之陷榮經知
縣黃儒死之屯洪雅之天生城義民余飛死之冬十月辛巳
朔日有食之嚴起恆疏請修省是月朱成功取銅山南澳閩

安諸島十一月辛亥我

大清兵克廣州杜永和走瓊州甲寅入興安之嚴關諸軍皆潰遂入桂林督師大學士瞿式耜江廣總督張同敵死之己未上奔潯州陳邦傅叛劫從官於藤江部郎潘駿觀董英許玉鳳被賊王化澄曼清走北流嚴起恆馬吉翔李元胤追扈及於南甯從官饑凍無人色乃括行橐並吉翔所獻四千金散給之趙印選胡一青之師駐濱州化澄暨戶部尙書童天閔降於我

大清十二月明閏十一月擢兵科給事中張孝起爲副都御史巡撫南甯遣編修劉蒞封孫可望爲冀王猶不受高必正李來亨之眾走川東朱成功奉詔率舟師南下勤王我

大清順治八年辛卯春正月明永曆四年十二月己酉朔加大學士文安之太子太保兼吏兵二部尙書總督川湖軍務齋敕進王光興等十六營爵皆公侯孫可望邀之都勻奪諸將欵印安之走貴州二月己卯朔明永曆五年正月朔上在南甯以國家多難免朝賀閏二月明二月癸亥梧州陷癸酉柳州陷孫可望遣兵至南甯殺大學士嚴起恆尙書楊鼎和給事中劉堯珍吳霖張載述乃封可望爲秦王可望尋殺東閣大學士楊畏知是月朱成功師次平海衛我

大清遣降將馬得功襲破廈門守將鄭芝莞遁前東閣大學士曾櫻死之三月提督李明忠之師潰於岢口高州陷夏四月丁未朔朱成功復取廈門戊午太后王氏殂於田州是月

兵部右侍郎傅鼎銓被執於廣信不屈死之五月葬太后於南甯上尊諡曰孝正莊翼康聖皇太后尋下詔曰頃以大行皇太后喪憂戚之中不遑視事今值服除當與大臣商決政事卽傳工部修中樞殿翰林院舉堪任日講記注員名以二十七日舉行孫可望疏請移蹕雲南召廷臣集議朱天麟謂當如所請以堅可望擁戴之心吳貞毓力持不可議遂寢天麟自請經略左右兩江許之是月朱成功攻漳浦總督江西義師兵部尙書揭重熙被執於貴溪之百丈礮不屈死之星子生員吳江兵潰前督師余應桂死之於是江右義師略盡矣秋八月贈瞿式耜粵國公張同敞江陵伯九月陳邦傳誘殺宣國公焦璉率潯州總兵李時方有聲等以叛降於我

大清尋陷平樂左軍都督朱閔如死之襲清遠衛指揮白常
燦死之王寅聞潯州報上發南甯是月丙子舟山亡監國魯
王航於海朱成功復攻漳浦冬十月上次新甯冊尊生母馬
太妃爲昭聖仁壽皇太后立子慈烜爲皇太子是月劉文秀
取嘉定袁韜武大定降總督李乾德自殺我

大清兵取眉州向成功死之李占春與劉文秀戰敗于大海
遂以所部降於我

大清十一月李元楨疏請駐防城不許是月朱成功與我
大清兵戰於小盈嶺十二月甲辰朔我

大清兵取濱州庚戌取南甯趙印選胡一青敗走報至上由
水道走土司抵瀨湍二將報我兵相距纔百里上下失色從

官多散去乃舍舟從陸盡焚龍舟重器而行己次羅江追騎相去纔一舍會日晡引去乃少安徑由安平下雷歸順一路進發諸蠻供糧餉並從官夫役甚給孫可望亦以既受秦封遣其將狄三品陳國能高文貴率兵三千迎扈疏請移蹕安隆許之是月故少傅朱國禎之孫某起兵湖州之南潯鎮敗死朱成功取漳浦我

大清順治九年壬辰春正月癸酉朔上次龍英稱永曆六年乙亥次皈朝留九日始發甲申次富川乙酉次沙斗丙戌次西洋江丁亥次寶月關戊子次廣南孫可望再遣總兵王愛秀奉表至丁酉發廣南次童卜戊戌次晒利己亥次鼎貴庚子次加蒲辛丑次那羊壬寅次姪堂是月監國魯王次於厦

門朱成功取海澄二月戊申上至安隆所改名安龍府遣太常寺卿吳之俊齎璽書至滇我

大清兵入欽州趙印選棄城走杜永和以瓊州降是月我大清命降將吳三桂取四川孔有德取貴州嘉定陷川南巡撫范文光死之三月壬申朔建行在太廟己卯湖北大風霾晝晦孫可望疏請遣李定國出楚征鹵將軍馮雙禮副之拒孔有德步騎八萬由武岡出全州以攻桂林遣劉文秀入蜀討鹵將軍王復臣副之拒吳三桂步騎六萬分出敘州重慶以攻成都是月朱成功與我

大清兵戰於江東橋我兵退守泉州成功遂復長泰進攻漳州夏四月吳三桂由佛圖關連取重慶敘州提學道任佩弦

降時劉文秀兵未至白文選王復臣退守永甯五月德州大雨雹大者如瓜殺三人沈漕舟一南陽侯李元胤安肅伯李建捷被執至廣州不屈死之李定國復靖州進攻湖南六月張先璧馬進忠朝於行在晉先璧沅國公進忠鄂國公是月吳三桂取石泉川北巡撫詹天顏死之秋七月庚午朔李定國復寶慶辛未復全州與我

大清兵戰於嚴關孔有德走桂林癸酉攻拔之有德自殺執叛將陳邦傳父子送貴陽伏誅庚辰復永州是日黃霧四塞劉文秀取敘州吳三桂走緜州進拔重慶論恢復川楚功封李定國爲西甯王劉文秀爲南康王馮雙禮爲興國侯孫可望殺山東道御史李如月八月大學士朱天麟卒於廣南九

月博興侯張月執提督李明忠以叛降於我

大清我兵遂復取梧州川陝總督樊一蘅卒是月朱成功敗績於九龍江解漳州圍退屯古縣冬十月劉文秀進攻保甯敗績討鹵將軍王復臣死之文秀還雲南罷職閒住時可望忌定國而文秀又見廢諸將始有怨心我

大清兵敗朱成功於古縣成功退屯海澄十一月辛巳李定國復衡州孫可望駐沅州遣白文選攻辰州拔之殺降將徐勇丁亥我

大清敬謹親王尼堪奉命征楚粵抵湘潭馬進忠走寶慶我兵復取衡州李定國敗走尼堪追之歿於陣定國乃屯兵武岡時上在安龍日益窮促將吏罕人臣禮馬吉翔掌戎政麗

天壽督勇衛營謀逼上禪位可望惡大學士吳貞毓之不附已也嗾其黨冷孟鉅吳象鉉方祚亨交章劾之上知貞毓忠寢不行吉翔陰教可望劄諭吉翔天壽內外機務歸戎政勇衛兩衙門中外惶懼於是御史胡士瑞與吏科給事中徐極兵部員外林青陽主事張鐫工部員外蔡縝連章發其奸上怒兩人求救於太后以免可望又自設內閣六部官鑄八疊印盡易舊印立太廟享太祖高皇帝主於中張獻忠主於左而右則可望祖父也擬國號曰後明上聞之益憂懼密謂中官張福祿全爲國曰聞西甯王李定國已定廣西俘叛逆軍聲丕振出朕於險者必此人也欲下一敕令統兵入衛若等能密圖否二人言徐極林青陽張鐫蔡縝胡士瑞可與謀趣

告之皆諾以白貞毓青陽請行乃令佯乞假歸葬屬員外蔣
乾昌撰敕主事朱東旦書之福祿等持入用寶青陽卽日間
道齋赦行故吉翔輩不之知也是月常在郭氏以罪誅賜巴
東王某暨妃某氏自盡十二月藤縣復陷總兵羅超死之平
樂陷守將彭俊死之封莫宗文爲安仁伯是歲可望殺宗室
之在貴州者我

大清順治十年癸巳春正月戊辰朔上在安龍稱永曆七年
二月我

大清貝勒屯齊復取永州李定國敗走龍虎關孫可望謀襲
之定國走廣西廉州復陷守道王道光死之三月楊國棟莫
宗文合兵攻常德不克可望自將追定國不及與我

大清兵過於寶慶大敗走峒口我

大清兵亦引還是月魯王以海自去監國號其將定西侯張名振以朱成功之師入長江被京口還駐崇明夏四月降將郝尙久以潮州叛我

大清來歸五月封楊時清征定侯我

大清兵攻海澄朱成功禦卻之六月上以林青陽久未還將擇使往促吳貞毓舉翰林孔呂周官以對都督鄭允元曰假事出吉翔於外庶有濟也上乃命吉翔往梧州謁祭輿陵而密遣周官齋敕詣定國官涕泣受命封朱成功爲漳國公閏六月李定國攻肇慶敗績退駐柳州總兵周金湯復遂溪秋七月李定國再攻桂林不克孫可望聞定國之敗也遣馮雙

禮襲之遇伏而敗九月我

大清兵克湖州郝尙久伏誅朱成功遣兵救之不及冬十月
吳川復陷陳彝典陳其策死之十二月郴州復陷巡撫朱俊
臣死之馬吉翔奉命祭陵途次微聞密敕事屬其弟雄飛出
家貲賂提塘王愛秀求援時吉翔黨與布列上孤立自危乃
以臺省員缺飭部考選於月之二十四日臨軒親試授蔣乾
昌李元開簡討張鏞給事中李順胡士瑞御史楊鍾徐極等
亦以資深加秩羣小益危懼吉翔愛秀白可望可望疑吉翔
亦與謀遣鄭國往南甯偵之吉翔證青陽周官事甚亟於是
徐極楊鍾趙廣禹蔡縝張鏞李順胡士瑞交章劾吉翔欺君
賣國天壽表裏爲奸上敕廷臣議罪天壽懼與雄飛走貴陽

我

大清順治十一年甲午春正月壬辰朔上在安龍稱永曆八年改雲南爲雲興府辰州爲沅興府沅州爲黔興府孫可望疏請以劉文秀爲大招討都督諸軍東伐文秀辭強起之是月江西廣信九仙山寨陷進士徐敬時等死之前監國魯王移居南澳張名振復以舟師入長江望祭孝陵朱成功遣兵攻崇明敗績仁武伯平原將軍姚志倬定南伯徐仁爵死之二月開科取士四十人四川熊渭第一授庶吉士餘授知縣教職有差李定國復高州降將張月復叛

大清來歸孫可望既聞密敕事使鄭國楫馬吉翔至安龍與諸臣面質挾吳貞毓人文華殿脅上索主謀者上不敢質言

謂必外人假敕寶所爲國怒目出與麗天壽至朝房械貞毓并刑科給事中張鑑中軍都督府左都督鄭允元大理寺丞林鍾太僕寺少卿趙賡禹翰林院檢討蔣乾昌李元開吏科給事中徐極江西道御史周允吉廣西道御史宗室議泥福建道御史胡士瑞兵部郎中朱東旦工部郎中蔡續內閣中書易士佳吏部員外郎直誥敕房事任斗墟等十四人繫私室中官張福祿全爲國愬於太后求救天壽直入擒二人於坤甯宮外太后與后稍問之天壽怒訶徑出冷孟鉅朱企鏐蒲纓宋德亮逼上速具主名上大悲憤曰汝等逼朕認出朕知是誰翌日以次拷鑿等諸臣不勝楚皆自承國又問皇上知否纓大聲曰未經奏明乃復收繫以欺君誤國盜寶矯詔

爲罪報可望可望請上親裁上無如何下廷議吏部侍郎張
佐辰刑部主事蔣御曦稟旨以鑑福祿爲國三人爲首凌遲
餘爲從斬貞毓以大臣賜絞吉翔天壽謂后必知情將廢之
嗾主事蕭尹陳往古廢后事上不許事得已可望憾定國益
深定國亦慮可望襲已出掠雷廉以避之夏四月定國復羅
定新興石城電白陽江陽春等縣六月攻梧州冬十月圍廣
州十一月改都康萬承安平龍安諸州爲府是月朱成功奉
表行在遣兵援李定國於廣東十二月我

大清命降將尙可喜耿繼茂援廣州定國敗走尋攻擊慶不
克是月朱成功取漳州我

大清順治十二年乙未春正月丙戌朔上在安龍稱永曆九

年是月朱成功取仙遊自置官屬於中左所改曰思明州二
月江南地震李定國自高州退入南甯劉文秀駐兵川南夏
五月劉文秀攻常德敗績是月張名振復舟山六月江南地
震朱成功復揭陽遂復普甯我

大清命鄭親王世子濟度率師平海朱成功墮安平鎮及漳
州府惠安同安南安三縣城回師廈門冬十一月魯太師定
西侯張名振卒是歲上在安龍塗葦薄以處日食脫粟守將
承孫可望意更相凌逼挾彈騎馬直入宮門文吏乘輿過殿
呵之不下仍改安龍爲安隆歲造開銷銀米冊報可望稱皇
帝一員月支若干皇后一口月支若干上亦隱忍之苟延殘
喘而已我

大清順治十三年丙申春正月庚辰朔上在安龍稱永曆十
年時李定國駐兵南甯衰弱不振孫可望遣總兵張明志關
有才襲之定國用中書金維新曹延生計從田州小路出不
意敗明志等軍降其眾三千人遂進趨安龍二月壬子舟山
城哭三月孫可望聞田州之敗知李定國必至安龍令白文
選將兵迎上入貴州太后聞之哭從官皆哭文選見之心動
度定國軍且至陰留候之至則與速和奉上由安南衛走雲
南抵曲靖時守滇者劉文秀也亦怨可望因偕扈入省垣沐
天波迎駕馬龍驛上居可望第改雲南府爲滇都論迎扈功
封定國爲晉王文秀爲蜀王文選爲鞏國公王尙禮爲保國
公王自奇爲夔國公賀九儀爲保康侯張虎爲醴化伯餘進

職有差自尙禮以下皆可望心腹不爲上用者以其在雲南且擁重兵故並封焉以金維新爲行在吏部侍郎兼左都御史龔銘爲行在兵部侍郎加黔國公沐天波柱國少師命馬吉翔入閣辦事如故初定國命靳統武執吉翔將請詔治罪吉翔則日夜媚統武及維新銘因得媚於定國定國信之因疏薦入閣辦事上不得已從之又雷躍龍扶綱張佐辰王應龍龔彝皆可望黨也上欲安可望心以躍龍綱爲大學士佐辰吏部尙書應龍工部尙書彝戶部左侍郎遣白文選回貴陽慰諭可望夏四月我

大清兵攻廈門復攻金門朱成功禦卻之秋七月義甯伯龍縉駐柳州以應李定國尋敗死是月朱成功復闖安進攻福

州敗績八月我

大清兵復取舟山守將魯英義伯阮駿總督陳六御總兵張
晉爵太常卿陳九徵副使俞師範誠意伯裔孫劉永錫皆死
之前魯戶部主事王江復起兵四明山敗績死之九月辰州
復陷冬十月夔州巡撫鄧希明總兵張元凱降於我

大清十二月朱成功攻羅源甯德賊於護國嶺我梅勒章京
阿克襄歿於陣我

大清順治十四年丁酉春正月甲辰朔上在滇都稱永曆十
一年是月朱成功攻溫州二月甲申皇子出閣講學三月定
國公鄭鴻逵卒於金門夏四月癸酉朔上宏光帝諡曰安宗
簡皇帝后曰簡皇后隆武帝諡曰紹宗襄皇帝后曰襄皇后

皇考端皇帝諡曰禮宗端皇帝皇嫡母王氏曰端皇后下詔

大赦是月朱成功部將施舉敗績於定海關死之五月遣張

虎送孫可望妻孥還貴州時可望日夜謀犯關上欲歸其妻

孥以安之王尙禮王自奇張虎皆可望心腹而虎奸黠尤用

事自以位在諸人下甚怏怏白文選謂李定國劉文秀曰今

尙禮自奇擁重兵在輦轂下虎尤詭曰伺左右禍且不測今

與可望議和必皇上親遣虎行乃無反覆耳上召虎至後殿

拔頭上金簪賜之曰和議成卿功不朽必賜公爵此簪賜卿

爲信見簪如見朕也虎至貴陽則搆之益甚適上又命文選

與議和可望拘留之奪其兵而遣僞通政司朱運久入滇詭

議和實與自奇尙禮謀內應也前時四川巡撫錢邦芑被拘大

興寺可望之僞兵部尙書程源僞都察院鄭逢元部將馬寶
馬維興馬進忠皆朝廷舊人願効忠邦芑教源逢元謂可望
曰使功莫如使過將才無出文選右者可望然之秋八月以
文選爲大總統馬寶爲先鋒合兵十四萬入滇十八日渡盤
江九月抵交水列三十六營去曲靖三十里定國文秀眾纔
數千人相顧失色文秀議走交阯定國欲由沅江景東取土
司躊躇兩日不能決忽文選率所部拔營逃至曲靖單騎走
雲南見定國文秀於朝言請將內應狀宜速出戰言畢卽上
馬馳文秀率祁三昇賀九儀胡一青趙印選吳子金李本高
之師赴之可望見文選逃欲退師馬寶懼謀洩大言曰我眾
十倍於彼以一人爲進退豈我輩非人乎可望乃遣寶與心

腹驍將張勝別將鐵騎七千間道夜襲雲南殺中書科中書
朱斗垣於道竇夜遣人定國營言之皆大驚遂拔寨出戰文
選率所部直冲馬維興營維興開營納之合兵繞可望陣後
定國文秀麾兵大進諸營皆歡呼迎晉王所向瓦解定國乃
命文秀文選追可望而自還師救雲南先是王自奇在楚雄
醉後殺定國營將而懼引其眾渡瀾滄江據永昌去雲南二
千餘里以故可望入滇時不相聞王尙禮將內應沐天波以
兵守之不得發張勝至金馬碧鷄坊下見交水報捷旗大驚
拔營去回至渾水塘遇定國列陣死戰定國幾不支馬寶於
陣後連發大礮勝遂潰走益州部將李承爵誘而縛之解雲
南告廟獻俘與其黨趙珣皆伏誅尙禮聞勝敗自縊死可望

逃至貴州從騎纔十餘人追且至狼狽走長沙冬十月乞降於我

大清諭反正功晉白文選鞏昌王馮雙禮慶陽王馮進忠漢陽王馬維興敘國公賀九儀廣國公馬寶淮國公餘進侯伯有差論黨逆罪誅醜化伯張虎降荆江伯張光翠德安侯狄三品岐山伯王會等爵程源鄭逢元等降級有差十一月追贈安龍死難大學士吳貞毓以下十八人謚蔭有差遣祭立廟十二月復南甯

小腆紀傳卷第五終

男承禮編解

仁和魏錫曾參校
會稽梁繼元覆校

小腆紀傳卷第六

前翰林院檢討加詹事府贊善銜六合徐肅謨

紀第六

永歷下

我

大清順治十五年戊戌春正月戊戌朔上在滇都稱永歷十二年遣漳平伯周金湯冊封朱成功爲延平王招討大將軍賜尙方劍便宜行事並封其部將王秀奇祥符伯馬信建威伯甘輝崇明伯黃廷永安伯萬禮建安伯陳輝忠靖伯洪旭忠振伯郝文興慶都伯餘拜爵有差授魯兵部右侍郎張煌言爲兵部左侍郎兼翰林院學士魯左僉都御史徐孚遠爲

左副都御史以程源爲禮部尙書錢邦芑掌都察院事橫州
再陷知州鄭雲錦死之二月我

大清命貝子洛託都督卓布泰偕降臣洪承疇吳三桂線國
安將兵分楚蜀粵三路取雲貴李定國遣劉正國楊武等分
守四川之三陂紅關馬進忠駐貴州三月吳三桂兵至合州
重慶總兵杜子香棄城走王自奇關有才據永昌反李定國
自將討平之用是不及援貴州貝子洛託至貴陽馬進忠棄
城遁巡撫冷孟錐死之庚辰吳三桂兵至三陂劉正國走遵
義遂陷庚寅大招討蜀王劉文秀卒五月吳三桂敗楊武於
開州之倒流水興甯伯王興水西宣慰使安坤酉陽宣慰使
冉奇鑣蘭州宣慰使奢保受降秋七月丙申朔命李定國爲

招討大元帥賜黃鉞大學士文安之督川東諸軍襲重慶不克是月朱成功張煌言會師大舉北伐以援滇次羊山颶風作旋師舟山八月授前江西總兵鄧凱爲隨扈總兵九月朱成功取象山冬十月我

大清信郡王鐸尼會三路兵於平越之楊老堡李定國使馮雙禮扼雞公背以拒中路張先璧扼南盤江之黃草壩拒東路自守北盤江之鐵索橋圖復貴州別遣白文選出西路率眾四萬守七星關抵生界立營若欲攻遵義者以牽制三桂之師先是三桂駐遵義信郡王駐武陵卓布泰駐獨山州惟洛託一軍駐貴陽大眾未集其勢可乘定國遂巡觀望比楊老堡戒期定國始悉眾出拒而事機已不可爲矣先由中路

出關嶺東路告急乃移師黃草壩久之踰石關營於炎遮河而中路雞公背之絕頂糧少運艱士不宿飽右路之生界孤懸滇蜀之表聲援不及識者俱以爲憂十二月甲子吳三桂兵出遵義由水西趨天生橋入烏撒文選棄七星關走可渡橋守橋之馬寶亦奔文選乃焚橋走霑益其廣西卓布泰一軍至盤江之羅顏渡扼險不得渡得泗城土司岑繼祿爲嚮導由間道入安龍懷仁侯吳子聖禦之敗績我軍取船以濟定國聞之以兵三萬人倍道趨戰於炎遮河

大清兵初戰不利詰朝悉師壓其營而陣南兵鎗礮北兵弓矢日中不決忽大風北來礮火及茅葦野燎滔天

大清兵乘火馳射兵火俱烈定國驚懼棄營保北盤江我廣

西兵遂由普安州入滇而信郡王中路兵亦潰馮雙禮於雞
公背追至北盤江諸將北走不相顧定國焚鐵索橋而遁
大清兵以浮橋濟師遂抵曲靖知府蓋世祿降定國奔還雲
南請上出幸丙子召廷臣集議劉文秀之部將陳建舉文秀
遺表請上幸蜀太僕寺正卿辜延泰亦請幸蜀開荒屯練中
書金公趾極言入蜀之不利定國曰蕞爾建昌何當十萬人
之至不如入湖南之峒烏車里里角諸蠻不相統攝我今臨
之必無所拒安蹕峒內諸將設祭於峒口勝則六詔復爲我
有不勝則入交阯召針羅諸船航海至廈門與延平王合師
進討難之者曰

清兵乘勝踰黃草壩則臨沅廣南道路中斷且喪敗之餘焉

能整兵以迎方張之敵乎黔國公沐天波曰自迤西達緬甸
其地糧糗可資出邊則荒遠無際萬一追勢稍緩據大理兩
關之險猶不失爲蒙段也馬吉翔李國泰咸是天波議定國
泣請留太子督師以牽制緬甸上猶豫不忍明日發滇都定
國以大兵殿後國勢旣搖人心思叛艾能奇之子承業糾狄
三賧等以驍卒伏大寺中謀劫定國而北定國嚴隊西走承
業等不敢發百官扈從男婦馬步數十萬人日行不過三十
里兵士乏食取之民間所在逃避御前供頓缺庶僚貧病雜
次不前從古乘輿奔播未有若此之艱難者我

大清順治十六年己亥春正月癸巳朔上次永平稱永曆十
三年乙未我

大清兵取滇都衛國公胡一青提學道徐心箴光祿寺少卿黃復生提督劉之扶土司龍世榮等降戶部主事劉之謙不屈死之丙申上駐永昌下詔罪己李定國還黃鉞自請削秩上曰是國之禍王何罪焉不許是月川東譚宏譚詣殺譚文以叛降於我

大清二月明閏正月辛未總兵王國勛敗績於普洱丙子白文選與張先壁陳勝之師皆敗績於玉龍關文選由沙木和走右甸尋走鎮康入木邦丁丑聞玉龍關之敗定國使總兵靳統武以兵四千扈上入騰越沐天波馬吉翔隨行文武官尙四百餘人已卯上至騰越辛巳定國渡潞江江不甚寬而水勢洶惡每歲清明至霜降有青草瘴雖土人亦惡之過江

二十里有磨盤山鳥道窳筍屈曲僅通一騎定國度
大清兵累勝窮追必不戒設柵數重三伏以待之秦安伯寶
民望爲初伏廣昌侯高文貴爲二伏總兵王璽爲三伏每伏
兵二千約俟

大清兵度山巔號礮起首尾橫突截攻必無一騎返而吳三
桂之追自文選至瀾滄江也編筏而渡再渡潞江逐北數百
里無一夫守拒謂定國遠竄不復慮隊伍散亂上山者已萬
有二千人忽大理寺卿盧桂生來降泄其計三桂則大驚時
前驅已入二伏急傳令舍騎而步以礮發其伏叢莽中矢礮
雨下民望不得已舉礮出戰三伏亦發礮趨下救之自卯迄
午短兵相接僵屍如堵牆民望血戰不已鎗彈穿脅過戰如

故持刀潰圍走不數里血湧仆地死定國坐山巔聞號礮失
序大驚忽飛礮落其前擊土滿面乃奔明兵死林箐者三之
一鏖戰死者亦三之一王璽陣歿而

大清亦亡都統以下十餘人喪精卒數千追至騰越西百二
十里中原界盡矣諸軍初猶踞險守聞定國走乃夜遁我

大清亦懲是役之權不測不復窮追矣壬午上自騰越出奔
時李國泰馬吉翔輜重甚厚趣上乘夜走南甸上南行二日
尙未知磨盤之敗也二十四日野次未定忽總兵楊武至言
定國遠逃追者將及上遂接浙跟踰行昏黑迷路大谷中羣
臣妻子不相顧亂兵乘機劫掠火光燭天驚擾奔馳及天明
仍在故處也而貴人宮女已失去過半扈將平陽侯孫崇雅

劫殺尤烈上以從臣多叛決意入緬甸遂出鐵壁關戊子抵
囊木河是爲緬境上命沐天波諭之緬人奉迎具表如常儀
請從官勿佩戎器馬吉翔遽傳旨從之從臣皆諫不聽晦日
至蠻漠土司思絲迎入城執禮甚恭時沐天波與外戚華亭
侯王維恭典璽李崇貴謀擁太子入關由茶山出鶴麗調度
各營爲聲援王后不可乃不果行是月雅州伯高承恩率諸
土司斂兵拒守昆明諸生薛大觀舉家赴水死三月明二月
壬辰朔上抵緬甸之大金沙江緬人以四舟迎上從官自覓
江舟隨行者六百四十餘人陸行者自故岷王子而下九百
餘人期會於緬初定國潞江之敗求上所在則上西行去騰
越已百里念君臣俱死無益聞白文選在木邦就之謀再舉

文選以上左右無重兵請身自捍衛意不合定國引所部從孟定府過耿馬抵猛緬各營潰兵陸續集勢稍振文選以兵抵阿瓦城己酉上駐井梗緬人報明兵四集請救阻之從官會御舟前議所使總兵鄧凱行人任國璽請行馬吉翔恐二臣暴其罪惡陰尼之不果文選不得命與緬人戰不勝走孟良緬酋來邀大臣過河議事命吉翔弟雄飛與御史鄔昌琦往緬人問神宗時事二臣不能答用是益見輕侮閏三月明三月黔國公沐天波綬甯伯蒲縵總兵王啟隆謀奉上走護臘撒孟良入李定國軍吉翔阻之亦不果從臣陸行者不知止之尙在井梗也竟抵阿瓦城緬人疑其有陰圖也發兵圍之總兵潘世榮降於緬通政使朱璽金中軍姜承得自縊死

副總兵高陞千戶謝安祚向鼎忠范存禮溫如珍李勝劉興隆段忠皆被殺餘安置遠方久之無存焉惟岷王子等八十人流入暹羅國是月吳三桂兵至姚安大學士張佐辰尙書孫順侍郎萬年策翰林劉蒞布政司宋企鎮等皆降又有少卿劉泌兵科胡顯等一百五十九人先後降還至雲南大學士扶綱侍郎尹三聘淮國公馬寶敘國公馬維興武靖侯王國璽懷仁侯吳子聖宜川伯高啟隆公安伯李如碧降延長伯朱養恩總兵龍贊陽以嘉定州降德安侯狄三品執慶陽王馮雙禮以降夏四月咸陽侯祁三昇以兵迎上緬人請敕止之吉翔請遣錦衣衛丁調鼎考功司楊生芳往三昇痛哭撤師阿瓦城緬酋所居也有地名者梗卽大鷓鴣城舊地也

界大金沙小盈沙之間地饒而險緬人自祁三昇奉敕止師
之後知上威令尙行慮後得罪乃優奉之爲緩急自救之策
且以阻內外聲聞於初四日甲子遣其都官備龍舟鼓樂迎
上於井梗乙丑移蹕丁卯至阿瓦城距河止焉戊辰陸行五
六里至者梗草廬十餘間上居之編竹爲城守兵百餘人從
臣自備竹木結宇而聚處焉緬婦來貿易者雜沓如市從臣
久亦習之屏禮貌短衣跣足闕入緬婦隊中踞地喧笑呼盧
縱酒緬人頗哂之是月癸酉朱成功張煌言復會師大舉北
上以援滇六月我

大清兵取馬湖敘州提督陳希賢降取成都總兵趙友驛御
史龐之泳主事賀奇等皆降雅州伯高承恩爲其弟承裔所

殺是月丙午朱成功攻瓜洲克之癸丑克鎮江秋七月張煌
言徇江南北府州縣下二十九城壬午成功敗績於江甯崇
明伯甘輝等死之退攻崇明不克煌言亦敗於銅陵尋皆入
海所復府州縣皆復歸於我

大清八月緬酋以中秋日張會享羣蠻來招沐天波渡河並
索禮物上欲爲好於酋命天波往至則脅令白衣椎髻跣足
領諸海郡熨夷酋而拜天波不得已從之九月緬人進新稻
頒諸從官冬十月戊子朔頒歷於緬甸是月李定國移營孟
連承制加土司勳爵孟艮之女酋某爲梗誅之據其城川將
郝承裔王友進皆降於我

大清十一月癸亥沅江陷總督銜土知府那嵩死之十二月

白文選移軍猛塚我

大清順治十七年庚子春正月丁巳朔上在緬甸之者梗稱
永歷十四年德陽王至瀋自交阯降於我

大清三月大學士方端士頴國公楊武亦降李定國部將廣
國公賀九儀將降事洩定國誅之是月張煌言駐軍林門尋
移駐桃渚夏四月白文選移軍景線五月甲子我

大清兵攻廈門朱成功禦卻之誅叛將陳鵬秋七月白文選
由木邦舉兵薄阿瓦阿瓦有新舊二城上居舊城之者梗而
緬酋自居於新城文選假道奉迎不得乃急攻新城緬人招
沐天波過河敕止之始知諸將臨緬迎駕疏至三十餘道從
臣無以出險爲念者第草敕令毋進兵文選曰蠻人不足信

也急攻新城垂克矣緬人紿之曰三日後出新城讓上交選
信之卻兵十里城中得固備攻之反爲所敗望鷓鴣城痛哭
而去八月降將郝承裔復以雅州叛

大清來歸時舉朝醉夢招權納賄如平時馬吉翔請以湖廣
道御史鄔昌琦掌六科烏撤知府王祖望以醫中宮疾授禮
部主客司行人任國璽謀轉江西道國璽又與太常寺博士
鄧居詔相訐上欲面質之不果惟吉翔傳旨云鄧某當學好
而已庶僚之貧者饑寒藍縷大臣有三日不舉火者馬吉翔
李國泰以語激上上擲皇帝之寶令碎之以給從臣典璽太
監李國用叩頭不奉詔吉翔國泰竟鑿以分餉擁貲自贍不
顧也蒲纓大開賭肆晝夜呼盧上焚其居纓賭如故華亭侯

王維恭與楊太監拳毆喧譁聲徹內外用是緬人益輕之是秋九月太白經天凡十有五旬我

大清順治十八年辛丑春正月辛亥朔上在者棟稱永曆十五年丁巳我

大清世祖章皇帝崩己未

聖祖仁皇帝卽皇帝位以明年爲康熙元年時李定國據孟艮地饒魚稻諸將稍集軍聲復振白文選居木邦之南甸相去二千里不相聞也旣攻緬不克知定國取孟艮並有賀九儀之眾移書責以大義定國遂全師而西中途遇文選購緬人密奏上速計且曰臣等兵不敢深入者激則生內變也諭令扈送出險方爲上策何諸臣泄泄不以爲意也璽書慰勞

文選造浮橋迎蹕距行在纔六七十里緬人斷其橋計不行乃刑牲歃血誓必克緬緬首拔其豪邊牙鮐邊牙裸爲大將集兵十五萬遇於錫箔江巨象千餘夾以鎗礮陣橫二十里鳴鼓震天呼噪而進定國文選兵不及十一且戎器耗散惟操長刀手架白楛以鬪定國前隊稍卻文選警眾橫截之緬兵大敗僵死萬計邊牙裸死於陣而邊牙鮐猶收餘眾柵大榕樹林中蔭翳百里鳴鼓竟夜如列陣曉視之則已走空無一人遂渡錫箔江旣濟乃謀渡大金沙江焉咸陽侯祁三昇與定國不和走戶臘吳三桂招之遂率孟津伯魏勇總兵劉芝林王有功邵文魁等降馬乃陷土司龍吉兆龍吉佐死之三月錦衣衛趙明鑑謀誅馬吉翔李國泰奉太子出緬甸不

克是月朱成功進兵臺灣克赤嵌城夏四月定國等臨大金
沙江諭緬人假道入覲弁責其象馬糧糗爲入邊之計緬人
不從盡燒其江船據險設礮以守定國等糧少氣沮緬中耆
老曰從此而北至鬼窟山有大芭蕉林伐之作筏則可渡上
流有大居江地饒材木居民數百家燒鑛冶鐵舟可立具也
定國從之令都督丁仲柳浮蕉爲梁設厰造船緬人偵知船
工將竣以正兵綴定國而別遣奇兵搗船厰仲柳棄船走船
悉被焚時軍中挈眷行老幼纍纍疫作軍饑死亡相繼不得
已議還軍孟艮或曰緬中瘴癘夏秋爲甚加以千里無烟人
何以濟孟艮不可得而返矣西南海上有地高涼產魚稻月
餘可至盍往諸從之行至亦渺賴山下山亘數百里登岸一

覽竟西南大海遂駐軍焉五月御史任國璽禮部主事王祖望太常寺博士鄧居詔疏劾馬吉翔李國泰不報緬人罹兵火之厄懟其酋酋弟莽猛白守景邁景線引蠻眾五萬人入援大出金帛犒眾諸蠻遂歸心焉會吳三桂檄緬人獻上自効眾欲從之而酋不可莽猛白因眾怒縛酋篋輿中投之江而自立爲緬王來索賀禮且言供給之勞茫無以應於是咒水之禍作矣秋七月十六日緬人來進當事大臣渡河辭不行踰二日緬使再至曰慮諸君立心不好請飲咒水令諸君得自便貿易否則我國安能久奉芻粟邪沐天波欲辭焉馬吉翔李國泰曰蠻俗敬鬼重誓可往也乃行日向午緬人以兵圍行帳呼諸臣出諸臣倉卒無寸兵可持又慮震驚宮闈

不得已相將並出出則縛而駢殺之上聞與中宮將自縊總
兵劉凱以足疾免於行與內侍之僅存者勸上曰上死固當
如國母年高何且旣亡社稷又棄太后後世其謂皇上何乃
止已而緬人入宮搜財帛貴人宮女及諸臣妻縊於樹者纍
纍如瓜果上與太后以下二十五人聚一小屋中如待決之
囚忽通事引一緬官大呼曰毋得驚害皇帝及沐國公麾其
眾移上於沐天波之室大小存三百四十餘人樓居聚哭聲
聞一二里外寺僧哀之進以粗糲上驚悸成疾緬人慮上死
且無以致詞三桂乃汎潔行宮迎上復入居之貢衣被錦布
什物曰我小邦王子無他意無介介也諸臣之被戕者自松
滋王某以下沐天波馬吉翔王維恭魏豹馬雄飛王啟隆蒲

纓王自京龔勳陳謙吳承爵安朝柱任子信張拱極劉相宋宗宰劉廣寅宋國柱丁調鼎文臣鄧士廉楊在鄆昌琦鄧居詔任國璽王祖望裴廷謨楊生芳潘璜齊應選郭璘張崇伯內監李國泰李茂芳楊宗華楊強益李崇貴沈猶龍周某盧某曹某等凡四十二人自縊死者吉王慈燿偕其妃某氏貴人楊氏劉氏松滋王如某氏總兵姚文相黃華字熊相賢馬寶二差官錦衣衛趙明鑑王大雄王國相吳承允朱文魁吳千戶鄭文遠李旣白凌雲嚴麻子尹襄宗臣朱議漆凡二十二人婦女死者不具錄餘皆先後被屠惟鄧凱生還述其狀焉是月朱成功部將郭義蔡祿劫忠匡伯張進以叛降於我大清進死之八月李定國白文選次桐塢以十六舟攻緬緬

人鑿沈其五張國用趙得勝以賀九儀之死也銜定國謂文選曰王毋爲九儀之續挾文選入山據險自保定國不得已引餘兵三千還孟良其部將吳三省誅叛將唐宗堯駐軍耿馬九月吳三桂以我

大清兵追上於緬甸凡滿漢土司兵及降卒七萬五千并炊汲餘丁凡十萬人由大理騰越出邊三桂與定西將軍愛星阿將五萬人出南甸隴川猛卯分兵二萬命總兵馬甯王輔臣馬寶將之出姚關張國用趙得勝之挾文選北走也路過耿馬文選見吳三省不言而涕出三省察有變因言雲南軍降者皆怨恨不得所人心思明甚於往日張趙復心動與三省合屯於錫箔江聞

大清兵至木邦文選遣副將馮國恩偵之被獲軍情盡洩三桂選前鋒疾馳三百里至江濱文選毀橋走茶山三桂慮其窺木邦後路乃自與愛星阿結筏渡江而令馬寶分兵追文選及於孟養單騎赴文選營說之乃降宮嬪某氏死之十二月丙午朔三桂駐兵緬甸之舊晚坡上貽書責之曰將軍新朝之勳臣舊朝之重鎮也世膺爵秩藩封外疆烈皇帝之於將軍可謂甚厚詎意國遭不造闖賊肆惡突入我京城殄滅我社稷逼死我先帝殺戮我人民將軍志興楚國飲泣秦庭縞素誓師提兵問罪當日之本衷原未泯也奈何憑藉大國狐假虎威外施復讐之虛名陰作新朝之佐命逆賊授首之後而南方一帶土宇非復先朝有也南方諸臣不忍宗社之

顛覆迎立南陽何圖枕席未安干戈猝至宏光殄祀隆武就
誅僕於此時幾不欲生猶暇爲宗社計乎諸臣強之再三謬
承先緒自是以來一戰而楚地失再戰而東粵亡流離驚竄
不可勝數幸李定國迎僕於貴州接僕於南安自謂與人無
患與世無爭矣而將軍忘君父之大德圖開創之豐功督師
入滇覆我巢穴僕由是渡沙漠聊借緬人以固吾圍山遙水
遠言笑誰歡祇益悲矣既失世守之河山苟全性命於蠻服
亦自幸耳乃將軍不避艱險請命遠來提數十萬之眾窮追
逆旅之身何視天下之不廣哉豈天覆地載之中獨不容僕
一人乎抑封王錫爵之後猶欲殲僕以邀功乎第思高皇帝
櫛風沐雨之天下猶不能貽留片地以爲將軍建功之所將

軍旣毀我室又欲取我子讀鴟鴞之章能不慘然心惻乎將軍猶是世祿之裔卽不爲僕憐獨不念先帝乎卽不念先帝獨不念二祖列宗乎卽不念二祖列宗獨不念己之祖若父乎不知

大清何恩何德於將軍僕又何讐何怨於將軍也將軍自以爲智而適成其愚自以爲厚而反覺其薄奕禩而下史有傳書有載當以將軍爲何如人也僕今者兵衰力弱熒熒子立區區之命懸於將軍之手矣如必欲僕首領則雖粉身碎骨血濺蒿萊所不敢辭若其轉禍爲福或以還方寸土仍存三恪更非敢望倘得與太平草木同霑雨露於

聖朝僕縱有億萬之眾亦付於將軍惟將軍是命將軍臣事

大清亦可謂不忘故主之血食不負先帝之大德也惟冀裁之戊申未刻緬人給上以定國兵至卽昇上暨太后中宮以行後宮號哭震天步從五里許渡河已昏黃不辨徑路有負上登岸者問之則平西王前鋒高得捷也上入三桂營南面坐達旦三桂標下官入見者猶跪拜如禮頃之三桂入長揖上問爲誰三桂噤不能對再問之不覺膝之屈也問之數四始稱名以對上切責良久歎曰今亦已矣朕本北人欲還見十二陵而死爾能任之乎對曰能上麾之出三桂伏地不能起左右挽之出面如死灰汗浹背自是不復見越日鄧凱匍匐帳前曰事至此皇上當行一烈事使老臣得其死所上曰有太后在吳某世受國恩未必毒及我母子也初九日甲寅

三桂擁上北旋是月朱成功取臺灣張煌言駐師福建之沙關我

大清聖祖仁皇帝康熙元年壬寅春三月丙戌吳三桂以上還雲南居故都督府嚴兵守之夏四月戊午輦上及太子出以弓弦絞於市太子年十二大罵曰黠賊我朝何負於汝我父子何讐於汝乃至此邪上豐頤偉幹貌似神宗性惡繁華不飲酒無聲色玩好不甚學而喜講忠義事事兩宮盡孝死之日大風靄雷電交作空中有二龍蜿蜒而逝軍民無不悲悼者叢葬於雲南郡城之北門外或曰死於貴陽藁葬焉兩宮皆北上殂於道沅江總兵皮熊被執不屈死鄧凱入昆陽普照寺爲僧是歲夏五月招討大將軍延平郡王朱成功卒

六月招討大元帥晉王李定國卒明亡

男承禮編輯

仁和魏錫曾參校
會稽梁繼元覆校

小腆紀傳卷第六終

小腆紀傳卷第七

前翰林院檢討加詹事府贊善銜六合徐鼎謨

紀第七

監國魯王

王諱以海太祖十世孫魯肅王壽鏞之第五子也兄以派以長子襲封崇禎六年七月封爲鎮國將軍十五年

大清兵攻兗州城破以派自縊王年幼詭稱魯王牧兒見兵入王邸肯忽流淚怪而察之知爲王刃之三皆不中駭曰汝大有福我不殺汝乃舍去十七年春二月甲戌嗣魯王位北都之變諸王皆南下乙酉夏四月宏光帝命移駐台州五月南都不守六月浙中路王亦降閏六月己丑九江道僉事孫

嘉績吏科都給事中熊汝霖同起兵於餘姚其明日諸生鄭
遵謙應之紹興襲殺我招撫使於江上兵部尙書張國維起
兵東陽又明日刑部員外郎錢肅樂起兵於鄞以是月十八
日遣舉人張煌言奉箋赴台請王監國同時以兵以餉來歸
者總兵王之仁自定海黃斌卿遣將自舟山張名振自石浦
沈宸荃馮元颺亦應之慈谿聲勢震興二十八日再奉箋勸
進國維與宋之溥陳函輝柯夏卿等亦具表迎王卽日移駐
紹興以分守署爲行在途中加錢肅樂太僕寺少卿授張煌
言爲行人尋進肅樂右僉都御史加督師銜以張國維朱大
典宋之溥爲東閣大學士國維督師江上大典鎮守金華之
溥司票擬未幾召舊輔方逢年入直宋之溥罷起章正宸爲

戶部左侍郎行吏部事李占春戶部尙書王思任禮部尙書
余煌兵部尙書張文郁工部尙書陳函輝詹事府少詹事擢
陳潛夫爲太僕寺少卿尋改大理寺卿列兵江上盡地戍守
總兵方國安自浙西來駐守七條沙王之仁守西興鄭遵謙
守小巒孫嘉績熊汝霖錢肅樂分守滙海嘉績汝霖等亦加
僉都御史督師銜進國安鎮東侯之仁武甯伯秋七月會師
西興張國維復富陽封其子世鳳爲將軍命姚志倬守分水
江上兵每日葺食鳴鼓登陸搏戰日中復轉舵還戍率爲常
八月國維復於潛兵部尙書田仰從海道至留爲東閣大學
士賜張煌言進士加翰林院編修典制誥九月兵部主事攝
餘姚知縣王正中表進監國大統厯宣付史館冬十月壬辰

與

大清兵戰於江上方國安嚴陣以待張國維錢肅樂等率所部翼後前鋒副將鍾鼎新用火攻首先擊殺緋衣大將一諸將呂宗忠王國斌趙天祥各斬數十級直抵張灣奪獲軍械歸連陣十日諸軍皆有功第七戰尤捷追至草橋門下會大風雨弓矢各不能發而退時浙西諸路義旗四起蘇松嘉湖列營數百杭州孤懸危甚說者謂王初起江上適有浙西首尾相應之勢惜坐失此會也未幾分地分餉之議起統計浙東地丁正餉六十餘萬盡予正兵正兵者方王之眾也義兵則取給於義餉富戶樂輸之款也交爭之不能平而國安尤暴橫已正兵並取義餉致義兵無所仰給錢肅樂屢疏入告

王不能問但敘其十捷功加右副都御史具疏辭且言臣今不入杭誓不再受一官不許是時隆武帝立於閩中遣兵科給事中劉中藻頒詔於越將吏恇惑謠稱將避返台州張國維亟馳還令勿宣詔與熊汝霖議以唐魯同宗無親疏之別義兵同舉無先後之分惟成功者帝耳若一稱臣則江上諸將須聽命於閩如王之號令何錢肅樂朱大典謂宜權稱皇太姪報命大敵在前未可先離同姓議大不合然卒如國維指具疏以報於是閩浙水火矣行人張煌言自請充使赴閩釋二國之嫌從之以內臣容鳳儀李國輔兼制軍餉餉更不可問十一月進方國安荆國公王之仁武甯侯封鄭遵謙義興伯王勞軍江上駐劄西興築壇拜方國安爲帥命各營僉

聽節制初義兵派支鄞奉二縣義餉至是國安徽縣不準應
給致絕糧四十餘日行乞於道徒以肅樂忠義相激無敢叛
者時馬士英竄入方國安軍中阮大鍼亦踵至請朝見不許
十二月王回紹興以降臣謝三賓爲禮部尙書入閣辦事從
戚臣張國俊之請也國俊納三賓賄外倚方王勢內通客李
二奄與馬阮相呼應遂表裏作奸王之仁上疏言義師初起
人人有直下黃龍之志乃一敗後遂欲以錢塘爲鴻溝天下
事尙何忍言臣願率所部沈船決一死戰今日欲死猶及於
戰他日卽死恐不能戰也不報錢肅樂疏陳利害言國有十
亡無一存民有十死無一生王深然之而無若強帥何尋加
肅樂兵部右侍郎再疏辭不許命以王正中所進黃宗羲監

國魯元年丙戌大統歷頒行民間鑄大明通寶錢太常寺卿
莊元辰乞罷許之我

大清順治三年丙戌春正月己酉朔王在紹興稱監國元年
以柯夏卿曹維才爲使奉書閩中二月錄黃宗羲造歷從軍
功授兵部職方司主事張國柱掠餘姚其黨張邦甯掠慈谿
國柱劉澤清部將也初航海依王之仁子鎮倭將軍鳴謙於
定海有弓箭手五百人劫鳴謙入內地行朝震恐署以將軍
始退總兵陳梧敗於嘉興掠餘姚攝令王正中遣卒擊殺之
三月丙寅思宗大祥王於朝堂哭臨三軍縞素一日謀言
大清兵由海道來移錢肅樂守海口久之無所得餉乃與孫
嘉績連名請以兵歸開遠伯吳凱而身並從軍自效王溫旨

慰留諸帥嫉甚誣其貳於閩遣客刺之肅樂乃棄軍拜表以
行表言臣披髮入山永與世辭請賜偵迹必不入關自取殄
滅王賊歎自降旨令往海上偕黃斌卿張名振等作窺吳計
我

大清兵入錢塘江張國維王之仁率師拒戰東南風作之仁
揚帆奮鬪我

大清兵觸之舟多碎鄭遵謙獲鐵甲八百餘副張國維乘勝
渡江圍杭州不克而還閩中犒師僉都御史陸清源爲方國
安部兵所殺命張國維分兵備閩余煌督師江上夏四月我
大清兵以巨礮擊方國安營廚竈盡破國安歎曰此天奪我
食也遂有投關意王正中率眾渡海鹽復澈浦城五月加孫

嘉績熊汝霖東閣大學士督師如故而眾心已渙兩人又不
諳於軍乃以眾付黃宗羲王正中領之合師三千尙寶卿朱
大定大理卿陳潛夫兵部主事吳乃武查繼佐各募數百人
來附出海劄壇山將襲海甯聞江上兵潰皆散去壬申國安
拔營走紹興劫王南行鄭遵謙入於海張國維振旅追扈時
夏旱水涸有浴於江者我軍驅馬試之不及腹潮數日不至
訖爲神助六月丙子朔以數十騎過江列戍驚潰我

大清兵遂畢渡馬士英銜弗納之怨說方國安獻王以降乃
遣人守王守者病王得脫亟趨海門航海去令保定伯毛有
倫扈王妃張氏世子出定海張國維退守東陽我

大清兵取紹興禮部尙書王思任絕粒死兵部尙書余煌衣

冠赴水死禮部侍郎陳函輝大理寺卿陳潛夫通政使吳從魯主事葉汝菴高岱故山西僉事鄭之尹皆死之故太常博士李山於吳中絕粒死御史何宏仁追至關山嶺投崖死或曰爲僧去主事謝震龍被執抗言死又潭頭守將劉穆都督同知張國紀不屈死士民詳列傳義烏破大學士張國維死之武甯侯王之仁入海沈其妻孥乃由松江轉至南京抗言死大學士朱大典守金華不下馬阮導兵破之屠其城大典發火藥自焚死全家俱殉衢州陷知府伍經正推官鄧巖忠守將張鵬翼江山知縣方召俱死之自金衢陷全閩無一夫之拒矣王之出海也石浦富平將軍張名振棄其地以舟師來扈至舟山黃斌卿不納毛有倫扈王妃張氏及世子出海

叛將張國柱劫之北去妃死之時隆武帝已殂永勝伯鄭彩以其軍入海奉王入閩冬十月丁酉王發舟山十一月丙寅次中左所卽廈門也鄭芝龍已投誠密令彩執王歸命彩不可乃匿王以南夷貌類者服王冠服居舟中謂守者曰苟事急則縊以示之旣成功起兵海上亦駐廈門意不欲奉王稱明年爲隆武三年於是鄭彩奉王改次長垣我

大清順治四年丁亥春正月癸卯朔王在長垣稱監國二年以熊汝霖爲東閣大學士加張煌言右僉都御史辛未王禡牙誓師提督楊耿總兵鄭聯皆以兵來會進鄭彩建國公張名振定西侯楊耿同安伯鄭聯定遠伯周瑞閩安伯周鶴芝平彝伯阮進蕩湖伯鶴芝復海口以參謀林籥舞總兵趙牧

爲守時故尙書張肯堂募兵海上王貽書招之前僉都御史
金衢巡撫劉中藻以眾來歸授爲兵部尙書兼東閣大學士
二月壬申朔襲海澄圍其城癸酉攻漳州總兵陳國祚戰死
甲戌我

大清兵救海澄退入於海丙子閩人洪有楨起兵復漳浦守
之己卯遣兵攻福州尋攻興化癸巳攻福清俱不克三月己
未周鶴芝攻閩安夏四月漳浦復陷洪有楨死之鄖西王常
潮復建甯其裨將王祁復邵武是月降將吳勝兆謀以松江
叛我

大清來歸事覺伏誅戶部侍郎沈廷揚兵部侍郎陳子龍兵
科給事中楊廷樞等死之五月壬戌鄭彩復長樂時海口復

失林籥舞趙牧死之周鶴芝退守火燒嶼六月攻漳州不利
錢肅樂來覲王大喜授兵部尙書秋七月王親戎次長垣會
鄭彩周瑞周鶴芝阮進之師攻福州敗績八月丙戌襲連江
冬十月長樂永福閩清皆下羅源知縣朱丕承甯德知縣錢
楛皆以城來歸以馬思理爲東閣大學士林正亨爲戶部尙
書沈宸荃爲工部尙書劉沂春爲右副都御史吳鍾巒爲通
政使余颺爲左都御史林嶠吏科給事中黃賓吏部考功司
郎中大學士劉中藻起兵福安攻福甯州守將涂登華降以
尙寶卿李向中巡撫其地辛未鄧藩審理陳世亨以一旅復
瑞安援兵不繼被執不屈死吏部文選司員外郎林塗兵部
右侍郎林汝翥起兵攻福清戰敗皆死之是月頒監國三年

大統歷於海上時朱成功亦頌隆武四年戊子歷於是海上
有二朔矣十二月鄞縣華夏屠獻宸王家勤楊文琦董德欽
杜懋俊施邦煇謀襲甯波不克死之我

大清順治五年戊子春正月丁酉朔王在閩安鎮稱監國三
年楊耿朱繼祚襲興化我分巡道彭遇颺故南都御史也伺
其守將出戰乃登陴盡易明幟守將不敢入城遂下癸丑鄭
彩殺大學士熊汝霖及義興伯鄭遵謙二月以錢肅樂爲東
閣大學士力辭弗許時鄭彩橫專朝政諸鎮皆惡之肅樂日
中繫艤王舟之次票擬章奏封進後卽解維別去每入見卽
流涕不止王亦泫然江西金聲桓部將郭天才以兵來歸封
忠勤伯三月職方主事王翊復起兵四明山自王入閩先後

克獲建甯邵武興化福甯三府一州及漳浦海澄連江長樂等二十七縣溫台響應軍聲頗振至是我

大清調兩廣江浙之兵三路進討所得府縣破失迨盡僅存甯德福安兩邑而已興化破大學士朱繼祚參政湯芬給事中林崑知縣都廷諫死之建甯破鄖西王常潮及守將王祁死之永福長樂間鄉宦士庶亦多殉義者夏六月戊戌兵部尙書大學士錢肅樂卒王聞震悼報朝賜祭子諡蔭冬十月馬思理卒以沈宸荃劉沂春爲東閣大學士我

大清順治六年己丑春正月庚申朔王次沙埕稱監國四年三月甯德破夏四月福安破兵部尙書大學士劉中藻衣冠坐堂上爲文自祭服金屑死翰林院簡討兵科給事中錢肅

範被執不屈死闔地悉陷六月定西侯張名振復健跳所遣使迎王秋七月壬戌王復入浙次健跳所鄭彩棄王去從者大學士沈宸荃劉沂春禮部尙書吳鍾巒兵部侍郎李向中戶部侍郎孫延齡左副都御史黃宗義兵部職方司郎中朱養時戶部主事林瑛及右僉都御史張煌言等每日朝於水殿中山王後徐仁爵以扈從功封定南伯壬午我

大清兵圍健跳所阮進以樓船至遂解去封王朝先爲平西伯朝先初同張國柱王鳴謙出海黃斌卿留之部下不以事任朝先請徇海邊劄奉化之鹿頭鎮遂有眾數千八月壬辰世子生九月丁酉張名振阮進王朝先合兵討黃斌卿誅之冬十月乙巳王駐舟山太保沈宸荃以疾請罷劉沂春還闕

以前吏部尚書張肯堂爲東閣大學士李向中爲兵部尚書
朱永祐爲工部尚書兼吏部侍郎孫延齡爲戶部尚書召僉
都御史張煌言爲兵部右侍郎李長祥爲兵部左侍郎擢給
事中徐孚遠爲左僉都御史御史王翊爲右僉都御史皆結
寨浙東朝行在也十一月遣澄波將軍阮美乞師日本國不
得請而返我

大清順治七年庚寅春正月乙卯朔王在舟山稱監國五年
岐陽王後李錫祚暨弟錫貢航海來朝命佐阮進軍守螺頭
門秋九月周瑞周鶴芝以樓船三百餘艘分屯溫之三盤爲
犄角四明山寨破兵部右侍郎王翊以其眾入海侍郎馮京
第爲叛將王昇所殺大皎山寨破御史張夢錫死之冬十月

辛巳朔日有食之我

大清順治八年辛卯春二月己卯朔監國六年正月王在舟
山我聞二月明二月乙卯張名振殺平西伯王朝先其部將
張濟明走降於我

大清舟山虛實盡洩我總督陳錦始決計大舉矣秋七月降
將張天祿出崇安分水關馬進寶出台州海門陳錦總督全
師出定海御史沈履祥督餉台州被執死舟山聞警王會諸
將議堵禦之策阮進獨當蛟關張名振督總兵張晉爵葉有
成馬龍英義將軍阮美阮驥遼南師張煌言阮駿率總兵顧
忠羅蘊章鮑國祥阮驛鄭麟都督僉事李英傑斷北洋都督
僉事任麟爲監督留定西中軍金允彥巡城主事邱元吉安

洋將軍劉世勳中鎮馬泰三標營守城已王搆世子欲登舟名振不得已奉王搆吳淞以牽制我師張肯堂以兵六千留守舟山八月辛酉我

大清兵試舟海口肯堂令阮進以三舟突陣奪樓船一戰艦十餘獲十一人縱之還丙寅大霧瀾漫咫尺莫覩頃之我

大清兵悉抵螺頭門守陣者方覺進還師遇之橫水洋以火毬擲敵舟風反轉擊進面爛焉李錫祚救之亦被創師燬力竭同投水死安洋將軍劉世勳左都督張名揚統精兵五百義勇數千背城奮戰殺傷過當會城中火藥盡中軍金允彥主事邱元吉跳城降城中鬻其子而呼名振還救我

大清兵聞之攻益急九月乙亥朔夜半星隕如雨明日午刻

諸軍力竭城遂陷世勳巷戰叢箭死歧陽李錫貢短兵巷戰
馬蹶被執不屈死名揚卽名振弟抱母范自焚死太傅吏部
尙書留守大學士張肯堂闔門二十餘人及其門下士禮部
主事蘇兆人兵部尙書李向中禮部尙書吳鍾巒工部尙書
朱永祐通政使鄭遵儉給事中董志甯郎中朱養時主事林
瑛江用楫董元李開國顧珍顧宗堯顧所正戴仲明參謀顧
明楫諸生林世英俱死之錦衣衛指揮王朝相護王妃張氏
貴嬪張氏義陽王妃杜氏投諸井以巨石覆之乃自刎太監
劉潮等從死者十有八人事後

大清兵相謂曰我軍南下所不易拔者江陰涇縣合舟山而
三耳名振之還救也會師火燒門離城六十里候潮長進發

突見城中煙燄蔽天知不可救乃解維去尋與大學士沈宸
荃兵部左侍郎張煌言扈王再入閩次廈門從官有侍郎曹
從龍太常卿任廷貴太僕卿沈文光副使馬星俞圖南少司
馬蔡登昌任穎眉主事傅啟芳錢肅遴陳蓋卿張斌葉時茂
林泌侍讀崔相中書邱子章賜蟒玉侍郎張冲符行人張吉
生張伯玉總兵張子先錦衣衛楊燦內官陳進忠劉玉張晉
李國輔劉文俊等數十人朱成功以宗人府宗正禮見王贊
千金紬緞百端安插從官饋月餼後有譖王於成功者成功
禮儀漸疏癸巳三月王自去監國號甲午移南澳己亥秋永
歷帝手敕命王仍監國而成功不欲遷王澎湖尋悔之迎歸
金門供給如初泊至永歷帝就俘成功亦卒閩南遺臣猶欲

再奉王監國貽書張煌言鄭經謀會師大舉會臺灣多事不
果壬寅冬十一月辛卯王殂於臺灣諸舊臣禮葬之

男承禮編輯

仁和魏錫曾參校
會稽梁繼元覆校

小腆紀傳卷第七終